

Phú Ćhías – Timor M

Gúte minás mí éle káman matháanum hamálulum bilá. Hín éle dáadoan bám, oor íne ímo háa úekáa hurúsam, mágam íne háa úekáa suá téeruman hurútas diyéyas búť suá apím, bés sénuma káa íne hán ġuníqış áadatan íte bilúm ke íne búť mól míbám. Oor búť judá búť mól numíninin néeršanin háalar díininin háale búť cál éćám. Oor háale áksar udéłjam, dáa ímo yuús, ámin bó ke, íne búť mudéłjam.

Akhí manás búť žigá érsa qháa duásimi, dáa músaťe háa úe ke ín cüm ós gálimi. Dáa káa káa hán dáa abášan bilúm. Íte ćaqooťi ité bilúm ke íne búť sís cüm úsar búť béske díćam, oor uéer úş phár étas ayémanam. Íte cüm sís háalar žúćumaťe úş dúmarase gáne háale ú ke tán óćám. Ín buťpa háale eémaibám. Eémanuma káa háale úar másła zućilúm, oor ar-phár nótan níćam ke “ínar ésuin ke mímar úş mićhış. Ámićhimi ke mí dáa búť máar abásiñ éćan,” nuséninin ú ár óćám. To gúte búť khéen qháa duáaş mánimi háale díimar buťpa cál imaibám, jamáatmo káa ke yúa káa ke. Abásate úe íte féesila étuman ke ín háa cüm hóle wásćan, íne káa óuruşabáan, búť azáar méecái,” nusénin, ité féesila étuman. Oor íte ámit há bilá ke íte yáťe épat hán máraćian bilúm. Íte máraći ínar íćhíman ke “gutéeulo ún hurú. Mí úne káa óuruşabáan,” nusén ú yáare úimo háale hurúşar dúunuman. Ín yáťe máraćiar ními oor teéle ímo ćái ke ímo şápik-mápíke bandobás teéle éćar şurúu étimi, oor éle gućháyas ke éle íne şurúu étimi.

Akhílaťe búť khéen ními, oor búťan sáaliñ cüm báadulo ín káman ġaliis imáyar ke dúunimi ke maphéer ke imáyar dúunam. Káman khéen cüm báadulo íne láman pháalije imánimi oor íte hán iríiñane káaman duró éćar dúunimi. Íte pháalij baask ke mayáar dúunimi. Ćharúrumulo íne ćái ikhárar éćumaťe to máraćiulo ikhárar garúrum étase gáne búťpa íte phú épaći hurúsam.

Híkulto íte ikháre garúrum éćama ke leél eémanumaťe íte phú káman íći lám mánimi íne gaťon će. Oor itée káa káa íte phú búť méimaťe ními. Oor íte búť numáninin ín béşal ják étasar íne qíu éćar dúunimi. Íne qíu étase káa uyóon yáare óyanum háale, ú atóyaleuman. Oor íne béşal búť sátíne qíu étase káa, hó íi şán umánuman. Oor gáarşume yáťe níćume baréimana ke íći phú ćhíbliúm. Ín búťpa igúlam. Búť ćamáat nétaninin íte phú úe éstaman. Mágam ín búť igúlam. Káa áşpitáalar íćhúman, oor íne káman míli ke éer étuman, háalar pháar ne díćuman. Díćin, mágam íne téeruman igúlam ke káman ġunćiñ cüm báadulo ín bardáaş ayémanumaťe dáal mánimi.

Íne háa sis dáa íne jamáat íljum qháa bám, músaťe íne jamáat ke dáa dáal mánubó.